



Broj: 05-04-20-141-5/26
Maglaj, 19.02.2026. godine

Na osnovu člana 70., u vezi sa članom 64. stav (1) tačka a) Zakona o javnim nabavkama („Službeni glasnik BiH“, br. 39/14, 59/22 i 50/24), člana 25. Pravilnika o javnim nabavkama u Općini Maglaj („Službene novine Općine Maglaj“, broj 13/22) i člana 42. Statuta Općine Maglaj („Službene novine općine Maglaj“, br. 8/07, 3/08, 6/08 i 6/24), a u vezi sa Zapisnikom o pregledu i ocjeni ponuda, broj 05-04-20-141-3/26 od 19.02.2026. godine, u postupku javne nabavke „Završetak izgradnje vodovoda u MZ Kosova, općina Maglaj“, Općinski načelnik donosi

ODLUKU

o izboru najpovoljnijeg ponuđača

I

Prihvata se preporuka Komisije za javne nabavke i ugovor o nabavci radova na završetku izgradnje vodovoda u MZ Kosova, općina Maglaj dodjeljuje se ponuđaču „KJD“ d.o.o. Maglaj, u skladu sa ponudom broj 01-252/26 od 16.02.2026. godine, po ukupnoj cijeni od 74.353,98 KM bez PDV-a, odnosno 86.994,16 KM sa uračunatim PDV-om.

II

Izabrani ponuđač iz tačke I obavezan je dostaviti dokumentaciju koja je tenderskom dokumentacijom utvrđena kao dokumentacija koju dostavlja izabrani ponuđač, u roku od pet dana od dana zaprimanja ove odluke.

III

Za realizaciju ove odluke zadužuje se Služba za urbanizam, geodetske i imovinsko-pravne poslove Općine Maglaj.

IV

Ova odluka dostavlja se svim ponuđačima koji su učestvovali u postupku javne nabavke i ima se objaviti na internetskoj stranici Općine Maglaj.

O b r a z l o ž e n j e

Odlukom o pokretanju postupka, broj 05-04-20-141/26 od 27.01.2026. godine, pokrenut je postupak javne nabavke „Završetak izgradnje vodovoda u MZ Kosova, općina Maglaj“, putem otvorenog postupka. Predmetna nabavka objavljena je na portalu javnih nabavki, Obavještenje o nabavci broj 1140-1-3-15-3-13/26 od 27.01.2026. godine. Sažetak obavještenja o nabavci objavljen je u „Službenom glasniku BiH“, broj 7/26.

Procijenjena vrijednost nabavke je 76.923,08 KM bez PDV-a, odnosno 90.000,00 KM sa uračunatim PDV-om. Kriterij za dodjelu ugovora je ekonomski najpovoljnija ponuda, sa potkriterijima „cijena“ (ukupno 98 bodova) i „rok plaćanja“ (ukupno 2 boda).

Predmetni postupak je, u skladu sa svojim nadležnostima, provela Komisija za javne nabavke imenovana Odlukom Općinskog načelnika, broj 05-45-1-926/25 od 22.05.2025. godine (u daljem tekstu: Komisija). U toku postupka, Komisija je zaprimila pristigle ponude, izvršila njihovo otvaranje, pregled i ocjenu, prema zahtjevima i kriterijima iz tenderske dokumentacije, o čemu je sačinila odgovarajuće zapisnike, u skladu sa čl. 63. stav (5) i 65. stav (2) Zakona o javnim nabavkama.

U predmetnom postupku, Komisija je utvrdila da su blagovremeno zaprimljene dvije ponude, prema redoslijedu zaprimanja kako slijedi:

r/ b	Naziv ponuđača	Sjedište ponuđača	Datum i vrijeme zaprimanja	Broj protokola
1.	“KJD” d.o.o. Maglaj	Ulica mladih 4, Maglaj	17.02.2026. 08,21h	1334
2.	P.D. “BN Transport” d.o.o. Zavidovići	Vikovići bb, Zavidovići	17.02.2026. 08,47h	1337

Komisija je, prilikom otvaranja ponuda, konstatovala da su zaprimljene ponude prihvatljive prema formi, obliku i potpunosti, odnosno dostavljene su u zatvorenim kovertama, na kojima su bili navedeni svi podaci traženi tenderskom dokumentacijom. Komisija je potom, na zatvorenoj sjednici, izvršila pregled i ocjenu ponuda, kako bi utvrdila da li iste ispunjavaju zahtjeve u pogledu ponudene cijene, predmeta nabavke, kvalifikovanosti ponuđača i ostalih uslova traženih tenderskom dokumentacijom.

Komisija je prihvatljivom ocijenila ponudu ponuđača „KJD“ d.o.o. Maglaj.

Komisija je neprihvatljivom ocijenila ponudu ponuđača P.D. “BN Transport” d.o.o. Zavidovići, iz razloga što nije dokazao da posjeduje ranije iskustvo u izvođenju radova koji su srodni radovima koji su predmet ove nabavke. Naime, ponuđač je, kao dokaz da posjeduje relevantno iskustvo, dostavio Potvrdu “Radis” d.o.o. Istočno Sarajevo o uspješno izvršenim radovima na izgradnji kanalizacione mreže i ABU uređenja na lokalitetu izletišta Zeleni vir, općina Olovo. Navedene radove Komisija nije prihvatila kao srodne, s obzirom da se radi o radovima na kanalizacionoj, a ne vodovodnoj mreži, što je predmet ovog postupka. Iako se radi o građevinskim radovima na cjevovodima koji imaju neke zajedničke karakteristike, oni nisu u dovoljnoj mjeri slični, jer su u pitanju zahvati koji se bitno razlikuju prema svojoj funkcionalnoj namjeni, tehničkim karakteristikama, uslovima izvođenja i regulatornom okviru. Zbog navedenog, ova ponuda je odbačena kao neprihvatljiva. Komisija također u zapisniku navodi da dostavljenu potvrdu nije izdala druga ugovorna strana, kako to zahtijeva član 48. stav (2) Zakona o javnim nabavkama, jer je iz potvrde vidljivo da je investitor Općina Olovo, ali potvrdu ne izdaju oni, nego “Radis” d.o.o. Sarajevo; te konstatuje da su ovakve potvrde neprihvatljive, s obzirom da je Ured za razmatranje žalbi, u više rješenja zauzeo stav da potvrde iz člana 48. Zakona o javnim nabavkama može izdati isključivo druga ugovorna strana (rješenja br. JN2-01-07-1-3522-7/22 od 19.01.2023. godine, JN2-01-07-1-223-7/23 od 21.02.2023. godine, JN2-01-07-1-448-7/23 od 30.03.2023. godine, i dr.).

Nakon analize i ocjene ponuda, u predmetnom postupku je preostala samo jedna prihvatljiva ponuda – ponuda ponuđača “KJD” d.o.o. Maglaj, koja je, u skladu sa metodologijom iz tačke 5.4. tenderske dokumentacije, bodovana sa ukupnih 100 bodova, kako slijedi:

r/ b	Naziv ponuđača	Cijena (bez PDV-a)	Bodovi po kriteriju cijena	Rok plaćanja	Bodovi po kriteriju rok plaćanja	UKUPAN BROJ BODOVA
1.	„KJD” d.o.o. Maglaj	74.353,98	98	60 dana	2	100

Po završetku poslova koji spadaju u njenu nadležnost, Komisija je sačinila zapisnik o pregledu i ocjeni ponuda, u kojem je detaljno navela sve informacije relevantne za predmetni postupak, kao i preporuku rukovodiocu ugovornog organa da ugovor za nabavku radova na završetku izgradnje vodovoda u MZ Kosova, općina Maglaj dodijeli ponuđaču „KJD” d.o.o. Maglaj. Preporuka je, zajedno sa izvještajem o radu Komisije, dostavljena rukovodiocu ugovornog organa 19.02.2026. godine.

U postupku donošenja ove odluke, posebno su cijenjene činjenice da je Komisija, sastavljena od stručnih lica, pravilno i potpuno izvršila ocjenu kvalifikovanosti ponuđača, te ocjenu pristiglih ponuda, u skladu sa kriterijima iz tenderske dokumentacije. Ugovorni organ nije našao nepravilnosti niti propuste u radu Komisije, koji bi eventualno bili osnov za neprihvatanje date preporuke za izbor najpovoljnijeg ponuđača i dodjelu ugovora. Uvidom u priloženu dokumentaciju, utvrđeno je da je Komisija u svemu pravilno postupila, u skladu sa svojim ovlaštenjima i relevantnim propisima, detaljno obrazlažući svoje radnje u svim fazama postupka, zbog čega je ugovorni organ utvrdio da je izbor najpovoljnijeg ponuđača izvršen u skladu sa Zakonom o javnim nabavkama, podzakonskim aktima i tenderskom dokumentacijom.

Na osnovu izloženog, a primjenom člana 64. stav 1. tačka a) Zakona o javnim nabavkama, odlučeno je kao u dispozitivu.

POUKA O PRAVNOM LIJEKU: Protiv ove odluke može se izjaviti žalba Uredu za razmatranje žalbi, putem ugovornog organa, Općine Maglaj, u roku od deset dana od dana prijema ove odluke.

DOSTAVLJENO:

1. Ponuđači – putem maila
2. Služba za urbanizam, geodetske i imovinsko-pravne poslove
3. Web stranica
4. a/a



OPĆINSKI NAČELNIK
Maid Suljaković

